

摘藻堂四庫全書薈要

史部

欽定四庫全書薈要

史部

通志卷一百九十七

詳校官員外郎臣楊世綸



欽定四庫全書叢要卷九千一百十五

史部

通志卷一百九十七

宋右史功郎鄭樵漁仲撰

四夷傳第四

南蠻上

南蠻序略 巴郡南郡蠻 板楯蠻 獠 南平

獠 東謝蠻 西趙蠻 牂柯蠻 兗州蠻 西

爨蠻 昆彌蠻 尾濮 木綿濮 文面濮

折腰濮赤

口濮  
附

黑獬濮

松外諸蠻

西南夷序略

夜郎

滇

音

邛都

笮都

笮音才  
各反

冉駹

音

哀牢

揮國焦  
僥夷附

附國

南蠻序略

昔高辛氏有犬戎之寇帝患其侵暴而征伐不尅乃訪

募有能得犬戎之將吳將軍頭者購金千鎰邑萬家又

妻以少女時帝有畜狗其毛五色名曰槃瓠

魏略曰高  
辛氏有老

婦患耳挑之得物大如繭老婦盛於瓠中覆之以槃瓠頃化為犬其文五色因名曰槃瓠

令既下槃

瓠遂銜人頭造闕下羣臣怪而診之乃吳將軍首也帝大喜而計槃瓠不可妻以女又無封爵之道議欲有報而未知所宜女聞之以為帝皇下令不可違信因請行帝不得已乃以女配槃瓠槃瓠得女負而走入南山止石室中所處險絕人跡不至

今辰州盧溪縣西有武山黃閔武陵記曰山高可萬

仞山半有槃瓠石室可容數萬人中有石狀槃瓠行跡今案山窟前有石羊石獸古跡甚多望石窟大如三間屋遙見一石似狗形相傳為槃瓠象於是女解去衣裳為僕鑒之結著獨

力之衣

僕鑒獨力未詳或改鑒字為豎者妄也結音髻

帝悲思之遣使尋求輒

遇風雨震晦使者不得進經三年生子一十二人六男

六女槃瓠死後自相夫妻織績木皮染以草實好五色

衣服製裁皆有尾形

千寶晉紀曰武陵長沙廬江郡夷皆槃瓠之後雜處五谿之內憑山

阻險每每為害常揉雜魚肉叩槽而號以祭槃瓠俗稱赤髀橫裙即其子孫也

其母後歸以狀

白帝於是帝使迎致諸子衣裳斑蘭語言侏離

侏離蠻夷語聲

好入山壑不樂平曠帝順其意賜以名山廣澤其後滋

蔓號曰蠻夷外癡內黠安土重舊以先父有功母帝之

女田作賈販無闕梁符傳租稅之賦

優寵之故蠲其賦役也荊州記曰沅

陵縣居酉口有上就武陽二鄉唯此是  
繫瓠子孫狗種也二鄉在武溪之北

有邑君長皆賜

印綬冠用獼皮名渠帥曰精夫相呼為婁徒

說文曰婁  
女人自稱

婁我也音烏朗反此  
已上並見風俗通也

今長沙武陵蠻是也其在唐虞與

之要質故曰要服夏商之時漸為邊患逮於周世黨衆

彌盛宣王中興乃命方叔南伐蠻方詩人所謂蠻荆來

威者也又曰蠢爾蠻荆大邦為讎明其黨衆繁多是以

抗敵諸夏也平王東遷蠻遂侵暴上國晉文侯輔政乃

率蔡共侯擊破之至楚武王時蠻與羅子共敗楚師殺

其將屈瑕莊王初立民饑兵弱復為所寇楚師既振然  
後乃服自是遂屬於楚鄢陵之役蠻與共王合兵擊晉  
及吳起相悼王南并蠻越遂有洞庭蒼梧秦昭王使白

起伐楚畧取蠻夷始置黔中郡漢興改為武陵

黔中故城在今

辰州沅陵縣西

歲令大人輸布一疋小口二丈是謂賔布

說文曰南

蠻賦也

雖時為寇盜而不足為郡國患光武中興武陵

蠻夷特盛建武二十三年精夫相單程等據其險隘大  
寇郡縣遣武威將軍劉尚發南郡長沙武陵兵萬餘人



乘船泝沅水入武谿擊之

沅水出牂柯故且蘭東北經辰州潭州岳州經洞庭湖入

江尚輕敵入險山深水疾舟船不得上蠻人知尚糧少

入遠又不曉道徑遂屯聚守險尚食盡引還蠻緣路徼戰尚軍大敗悉為所沒二十四年相單程等下攻臨沅遣謁者李嵩中山太守馬成擊之不能尅明年春遣伏波將軍馬援中郎將劉匡馬武孫永等將兵至臨沅擊破之單程等饑困乞降會援病卒謁者宗均聽悉受降為置吏司羣蠻遂平肅宗初武陵澧中蠻陳從等反叛

入零陽蠻界

零陽縣屬武陵

其冬零陽蠻五里精夫為郡擊破

從從等皆降三年冬淩中蠻覃兒健等復反

淩水名源出澧州崇

義縣也

攻燒零陽作唐孱陵界中

作唐縣屬武陵郡孱陵縣故城今荊州公安縣

西南孱音仕顏反

明年春發荊州七郡及汝南潁川弛刑徒吏

士五千餘人拒守零陽募充中五里蠻精夫不叛者四

千人擊澧中賊

充縣屬武陵郡充音衝

五年春覃兒健等請降不

許郡因進兵與戰於宏下大破之斬兒健首餘皆棄營

走還淩中復遣乞降乃受之於是罷武陵屯兵賞賜各

有差和帝永元四年冬淩中澧中蠻潭戎等反燔燒郵

亭殺畧吏民郡兵擊破降之安帝元初二年澧中蠻以

郡縣徭稅失平懷怨恨遂結充中諸種二千人攻城殺

長吏州郡募五里蠻六亭追擊破之皆散降賜五里六

亭渠帥金帛各有差明年秋淩中澧中蠻四千人並為

盜賊又零陵蠻羊孫陳湯等千餘人

零陵縣屬武陵郡也

著赤幘

稱將軍燒官寺抄掠百姓州郡募善蠻討平之順帝永

和元年武陵太守上書以蠻夷率服可比漢人增其租

賦議者皆以為可尚書令虞詡獨奏曰自古聖王不臣異俗非德不能及威不能加知其獸心貪婪難率以禮義是故羈縻而綏撫之附則受而不逆叛則棄而不追先帝舊典貢稅多少所由來久矣今猥增之必有怨叛計其所得不償所費必有後悔帝不從其冬澧中淩中蠻果爭賓布非舊約遂殺鄉吏舉種反叛明年春蠻一萬人圍充城八千人寇夷道遣武陵太守李進討破之斬首數百級餘皆降服進乃簡選良吏得其情和在郡

九年梁太后臨朝下詔增進秩二千石賜錢二十萬桓  
帝元嘉元年秋武陵蠻詹山等四千餘人反叛拘執縣  
令屯結深山至永興元年太守應奉以恩信招誘皆悉  
降散永壽三年十一月長沙蠻反叛屯益陽至延熹三  
年秋遂抄掠郡界衆至萬餘人殺傷長吏又零陵蠻入  
長沙冬武陵蠻六千餘人寇江陵荊州刺史劉度謁者  
馬睦南郡太守李肅皆奔走肅主簿胡爽扣馬首諫曰  
蠻夷見郡無儆備故敢乘間而進明府為國大臣連城

千里舉旄鳴鼓應聲十萬奈何委符守之重而為逋逃  
之人乎肅拔刃向爽曰掾促去太守今急何暇此計爽  
抱馬固諫肅遂殺爽而走帝聞之徵肅棄市度睦減死  
一等復爽門閭拜家一人為郎於是左右校令度尚為  
荊州刺史討長沙賊平之又遣車騎將軍馮緄討武陵  
蠻並皆降散軍還賊復寇桂陽太守廖祈奔走武陵蠻  
亦更攻其郡太守陳奉率吏民擊破之斬首三千餘級  
降者二千餘人至靈帝中平三年武陵蠻復叛寇郡界

州郡擊破之東晉時沔中蠻因劉石亂後漸徙於陸渾

以南徧于邑落宋齊以後荆雍二州

荆州江陵郡  
雍州襄陽郡

各置

校尉以撫寧之羣酋蠻帥互受南北朝封爵至後魏末

暴患滋甚僭稱侯王屯據峽路斷絕行旅周武帝遣開

府陸騰破平之又有別種蠻曰獠往代出自梁益間自

漢中達于邛笮李勢時始出巴西渠川廣漢陽安資中

犍為梓潼布滿山谷十餘萬落為梁益大患及後周平

梁益遂從賦役頗同華人然天性暴亂撫御少失擾動

隨之唐世兵威遠被其黔中蠻曰東謝西趙者自昔不  
為王臣皆置羈縻州使相攝領自是南寧昆彌諸濮及  
松外諸蠻往往皆稽服焉

巴郡南郡蠻

巴郡南郡蠻本有五姓巴氏樊氏暉氏音審相氏鄭氏皆

出於武落鍾離山

世本曰廩君之先故出巫誕也

其山有赤黑二穴巴

氏之子生於赤穴四姓之子皆生黑穴未有君長俱事  
鬼神乃共擲劍於石穴約能中者奉以為君巴氏子務



相乃獨中之衆皆歎又令各乘土船約能浮者當以為

君餘姓悉沈唯務相獨浮因共立之是為廩君乃乘土

船從夷水至鹽陽

荆州圖經曰副夷縣西有溫泉古老相傳此泉元出鹽今水有鹽氣縣西

一獨山有石穴有二大石並立穴中相去可一丈俗名為陰陽石陰石常濕陽石常燥盛弘之荊州記曰昔廩君浮夷水射鹽神於陽石之上案今施州清江縣水一名鹽水源出清江縣西都亭山水經云夷水出巴郡魚復縣注云水色清照十丈分沙石蜀人見澄清因名清江

鹽水有神女謂廩君曰此

地廣大魚鹽所出願留共居廩君不許鹽神暮輒來取

宿旦即化為蟲與諸蟲羣飛掩蔽日光天地晦冥積十

餘日廩君思其便因射殺之天乃開明

世本曰廩君使人操青縷以遺

鹽神曰嬰此即相宜乃與女俱不宜將去鹽神受縷而嬰之廩君即立陽石上詹青縷而射之中鹽神鹽神死

天乃大開明也廩君於是君乎夷城四姓皆臣之廩君死冤冤

世為白虎巴氏以虎飲人血遂以人祠焉及秦惠王并

巴中以巴氏為蠻夷君長世尚秦女其民爵比不更有

罪得以爵除其君長歲出賦二千一十六錢三歲一出

義賦千八百錢其民戶出帛布八丈二尺雞羽三十鐃

說文帛南郡蠻夷布也音公亞反毛詩四鐃既鈞儀禮矢鏃一乘鄭元注曰鏃猶候也候物而射之也三十鏃

一百二十矢俗本作  
蒙鏃作鏃者並誤也

漢興南郡太守靳彊請一依秦

時故事至建武二十三年南郡潯山蠻雷遷等始反叛

潯音屠

寇掠百姓遣武威將軍劉尚將萬餘人討破之徙

其種人七千餘口置江夏界中今沔中蠻是和帝永

元十三年巫蠻許聖等

巫縣屬南郡

以郡收稅不均懷怨恨

遂屯聚反叛明年夏遣使者督荊州諸郡兵萬餘人討

之聖等依憑岨隘久不破諸軍乃分道並進或自巴郡

魚復數路攻之蠻乃散走斬其渠帥乘勝追之大破聖

等聖等乞降復悉徙置江夏靈帝建寧二年江夏蠻叛  
州郡討平之光和三年江夏蠻復反與廬江賊黃穰相  
連結十餘萬人攻沒四縣寇患累年廬江太守陸康討  
破之餘悉降散

板楯蠻

板楯蠻夷者秦昭襄王時有一白虎常從羣虎數遊秦  
蜀巴漢之境傷害千餘人昭王乃重募國中有能殺虎  
者賞邑萬家金百鎰時有巴郡閬中夷人能作白竹之

弩乃登樓射殺白虎

華陽國志曰巴夷  
廖仲等射殺之也

昭王嘉之而以

其夷人不欲加封乃刻石盟要復夷人頃田不租十妻

不筭

優寵之故一戶免其一頃田之稅  
雖有十妻不輸口筭之錢復音福

傷人者論殺人

得以俛錢贖死

何承天纂文曰俛蠻夷  
贖罪貨也音徒濫反

盟曰秦犯夷輸

黃龍一雙夷犯秦輸清酒一鐘夷人安之至漢高祖為

漢王發夷人還伐三秦秦地既定乃遣還巴中復其渠

帥羅朴督鄂度夕龔七姓不輸租賦餘戶乃歲入實錢

口四十世號為板楯蠻夷閬中有渝水其人多居水左

右天性勁勇初為漢前鋒數陷陳俗喜歌舞高祖觀之  
曰此武王伐紂之歌也乃命樂人習之所謂巴渝舞也  
遂世世服從至於東漢郡守常率以征伐桓帝之世板  
楯數反太守蜀郡趙溫以恩信降服之靈帝光和三年  
巴郡板楯復叛寇掠三蜀及漢中諸郡靈帝遣御史中  
丞蕭瑗督益州兵討之連年不能剋帝欲大發兵乃問  
益州計吏考以征討方畧漢中上計程包對曰板楯七  
姓射殺白虎立功先世復為義人其人勇猛善於兵戰

昔永初中羌入漢川郡縣破壞得板楯救之羌死敗殆  
盡故號為神兵羌人畏忌傳語種輩勿復南行至建和  
二年羌復大入實賴板楯連推破之前車騎將軍馮緄  
南征武陵雖受丹陽精兵之銳

丹陽楚也南郡枝江有丹陽故城

亦倚

板楯以成其功近益州郡亂太守李顥亦以板楯討而  
平之忠功如此本無惡心長吏鄉亭更賦至重僕役箠  
楚過於奴虜亦有嫁妻賣子或乃至自剄割雖陳寃州  
郡而牧守不為通理闕庭悠遠不能自聞含怨呼天叩

心窮谷愁苦賦役因羅酷刑故邑落相聚以致叛戾非  
有謀王僭號以圖不軌今但選明能牧守自然安集不  
煩征伐也帝從其言遣太守曹謙宣詔赦之即皆降伏  
至中平五年巴州郡黃巾賊起板楯蠻夷因此復叛寇  
掠城邑遣西園上軍別部司馬趙瑾討平之及漢末天  
下大亂自巴西之宕渠遷於漢中楊車坂抄掠行旅號  
為楊車巴氏魏武克漢中李特之祖將五百家歸之魏  
武又遷於畧陽北復號之為巴氏蜀後主建興十一年



涪陵屬國人夷反車騎將軍鄧芝往討皆破平之其汚  
中蠻至晉世劉石之亂漸得北遷陸澤以南滿於山谷  
宛洛蕭條郡邑丘墟矣後魏道武定中山聲教被於河  
表泰恒八年蠻王福安率渠帥數千朝於代都求留質  
子太武始光中拜安侍子豹為安遠將軍江州刺史順  
陽公是時羣蠻亦復臣屬江左宋因晉舊於荊州置南  
蠻校尉雍州置寧蠻校尉以領之蠻人順附者輸穀數  
斛無餘雜調而宋人賦役嚴苦貧者不復堪命多逃入

蠻無徭役彊者又不供官稅結黨連羣動有數百千人州郡力弱則起為盜賊種類稍多戶口不可知也文帝

元嘉十八年天門

今澧陽郡地

淩中令宋矯之徭賦過重蠻

不堪命蠻田向求等為寇破淩中虜略百姓荊州刺史衡陽王義季遣兵討破之二十年南郡臨沮當陽蠻反縛臨沮令傅驥荊州刺史南譙王義宣遣兵討破之初雍州刺史劉道產善撫諸蠻前後不附者皆引出平土多緣沔為居及道產亡蠻又反叛至孝武出為雍州羣

蠻斷道臺遣太子步兵校尉沈慶之連年討蠻所向皆  
平孝武即位後大明中西陽蠻與諸蠻并叛沈慶之率  
江雍荆河州諸軍討之僅定明帝順帝世暴亂尤甚荆  
州為之虛弊齊高帝時武陵蠻田思飄武帝時黔陽蠻  
田豆渠湘州蠻陳雙並寇掠州郡其後雍司州蠻北通  
於魏頗為侵擾永明中除郢州蠻帥田駟路為試守北  
遂安左郡太守田驢王為試守宜人左郡太守田何代  
為試守新平左郡太守以慰安之先是魏文成興光中

蠻王文武龍請降魏拜為南雍州刺史魯陽侯孝文延  
興中大陽蠻酋桓誕擁漢水以北湏葉以南八萬餘落  
遣使內屬孝文拜誕征南將軍東荊州刺史襄陽王聽  
自選郡縣誕字天生晉偽楚桓元之子也元之敗也西  
奔至枚迴洲被殺誕時年數歲流竄大陽蠻中遂習其  
俗及長多智謀為羣蠻所歸誕既內屬居朗陵太和四  
年王師南伐誕請為前驅乃授使持節南征西道大都  
督討義陽不果而還十年移居潁陽十六年依例降王

為公十七年加征南將軍中道大都督征竟陵遇遷洛  
師停是時齊征虜將軍直閣將軍蠻酋田益宗率部曲  
四千餘戶內屬襄陽酋雷婆思等十一人率戶千餘內  
徙求居大和川詔給廩食後開南陽全有沔北之地蠻  
人安堵不為寇賊十八年誕入朝賞遇隆厚卒諡曰剛  
子暉字道進位龍驤將軍東荊州刺史襲爵景明初大  
陽蠻酋田育丘等二萬八千戶內附詔置四郡十八縣  
暉卒贈冠軍將軍三年魯陽蠻魯北驚等聚眾攻逼頻

詔左衛將軍李崇討平之徙萬餘家於河北諸州及六鎮尋叛南走所在追討比及河殺之皆盡四年東荊州蠻素安反僭帝號正始元年素安弟秀安復反李崇楊大眼悉討平之二年梁沔東太守田清喜擁七郡三十一縣戶萬九千遣使內附乞師討梁其雍州以東石城以西五百餘里水陸援路請率部曲斷之四年梁永寧太守文雲生六部自漢東遣使歸附初東荊州表太守桓叔興前後招慰大陽蠻歸附者一萬七百戶請置郡

十六縣五十詔前鎮東府長史酈道元檢行置之叔興  
即暉弟也延昌元年拜南荊州刺史居安昌隸於東荊  
州三年梁遣兵討江沔諸蠻百姓擾動蠻自相督率二  
萬餘人頻請統帥於叔興以為聲勢叔興給一統帥并  
威儀為之節度蠻人遂安其年梁荊州刺史蕭藻遣其  
將蔡令孫等三將寇南荊之西南沿襄沔上下討掠諸  
蠻蠻酋龍驤將軍樊石廉叛梁請援於叔興叔興遣將  
與石廉督集蠻夏二萬餘人擊走之斬令孫等三將藻

又遣其新陽太守邵道林於沔水之南石城東北立清水戍為抄掠之基叔興遣諸蠻破之四年叔興上表請不隸東荊州許之梁人每有寇抄叔興必摧破之正光中叔興擁所部南叛蠻酋成龍彊率戶數千內附拜刺史蠻帥田牛生率戶二千內徙揚州拜為郡守梁義州刺史邊城王文僧明鐵騎將軍邊城太守田官德等率戶萬餘舉州內屬拜僧明平南將軍西豫州刺史封開封侯官德龍驤將軍義州刺史自餘封授各有差僧明



官德並入朝蠻出山至邊城建安者八九千戶義州尋為梁將裴邃所陷梁定州刺史田超秀亦遣使求附請援歷年朝廷恐輕致邊役未之許會超秀死其部曲遂相率內附其後六鎮秦隴所在反叛二荆西郢蠻大擾動斷三鵠路殺都督寇盜至於襄城汝水百姓多被其害梁遣將圍廣陵楚城諸蠻並為前驅自汝水以南恣其暴掠連年攻討散而復合其暴滋甚又有冉氏向氏田氏者陬落尤盛餘則大者萬家小者千戶更相崇署

僭稱王侯屯據三峽斷遏水路荆蜀行人至有假道者  
周文畧定伊瀍聲教南被諸蠻畏服靡然向風矣大統  
五年蔡陽蠻主魯超明內屬授南雍州刺史仍世襲焉  
十一年蠻酋梅勒特來貢其方物尋而蠻帥杜青和及  
江漢諸蠻擾動大將軍楊忠擊破之其後杜青和自稱  
巴西州刺史入附朝廷因其所稱而授之杜青和後遂  
反攻圍東梁州其唐州蠻田魯嘉亦叛自號豫州伯王  
雄權景宣等前後討平之廢帝初蠻酋樊舍舉落內附

以為督淮北三州諸軍事淮州刺史淮安郡公于謹等  
平江陵諸蠻騷動詔豆盧寧蔡祐等討破之恭帝二年  
蠻酋宜人王田興彥北荊州刺史梅季昌等相繼款附  
以興彥季昌並為開府儀同三司加季昌洛州刺史賜  
爵石臺縣公其後巴蜀西人譙淹扇動羣蠻以附梁蠻  
帥向鎮侯向白虎等應之向五子王又攻陷信州田烏  
度田唐等抄斷江路文子榮復據荊州之政陽郡自稱  
江州刺史并隣州刺史蒲微亦舉兵逆命詔田弘賀若

敦潘和李遷哲等討破之周武成初文州蠻反州軍討定之尋而冉令賢向五子王等又攻陷白帝殺開府楊長華遂相率作亂前後遣開府元契剛等總兵出討雖頗翦其族類而元惡未除天和元年詔開府陸騰督王亮司馬裔等討之騰水陸俱進次於湯口先遣喻之而令賢方浚城池嚴設扞禦遣其長子西黎次子南王領其支屬於江南險要之地置立十城遠結涪陽蠻為其聲援令賢率其卒固守水邏城騰乃總集將帥謀進趣

咸欲先取水邏然後經畧江南騰言於衆曰令賢內恃水邏金湯之險外託涪陽輔車之援兼復資糧充實器械精新以我懸軍攻其嚴壘脫一戰不尅更成其氣不如頓軍湯口先取江南翦其毛羽然後遊軍水邏此制勝之計也衆皆然之乃遣開府王亮率衆渡江旬日攻拔其八城凶黨奔散獲賊帥冉承公并生口三千人降其部衆一千戶遂簡募驍勇數道分攻水邏路經石壁城極其險峻四面壁立故以名焉唯有一小路緣梯而

上蠻蜚以為峭絕非兵衆所行騰被甲先登衆軍繼進  
備經危阻累日乃得舊路騰先任隆州總管雅知其路  
蠻帥冉伯犁冉安西與令賢有隙騰乃招誘伯犁等結  
為父子又多遺錢帛伯犁等悅遂為鄉導水邏側又有  
石勝城者亦號險要令賢使其兄龍真據之騰又密告  
龍真云若平水邏使其代令賢處之龍真大悅遣其子  
詣騰騰厚加禮接賜以金帛蠻貪利既深仍請立効乃  
謂騰曰欲翻所據城恐人力寡少騰許以三百兵助之

既而遣二千人銜枚夜進龍真力不能禦遂平石勝城  
晨至水邏蠻衆大潰斬首萬餘級令賢遁走追而獲之  
司馬裔又別下其二十餘城獲蠻帥并三公等騰乃積  
其骸骨於水邏城側為京觀後蠻蜚望見輒大哭自此  
狼戾之心輟矣時向五子王據石墨城令其子寶勝據  
雙城水邏平後頻遣喻之而五子王猶不從命騰又遣  
王亮屯牢坪司馬裔屯雙城以圖之騰慮雙城孤峭攻  
未可拔賊若委城遁散又難追討乃令諸軍周迴立柵

遏其走路賊乃大駭於是縱兵擊破之禽五子王於石  
墨獲寶勝於雙城悉斬諸向首領生禽萬餘口信州舊  
居白帝騰更於劉備故宮城南八陳之北臨江岸築城  
移置信州又以巫縣信陵秭歸並築城置防以為襟帶  
焉天和六年蠻渠冉祖憲冉龍驤又反詔大將軍趙闇  
討平之自此羣蠻懼息不復為寇矣

獠

獠者蓋南蠻之別種自漢中達於邛笮州洞之間所在



皆有種類甚多散居山谷畧無氏族之別又無名字所  
生男女唯以長幼次第呼之其丈夫稱阿暮阿段婦人  
阿夷阿等之類皆語之次第稱謂也依樹積木以居其  
上名曰干蘭干蘭大小隨其家口之數往往推一長者  
為王亦不遠相統攝父死則子繼若中國之貴族也獠  
王各有鼓角一雙使其子弟自吹擊之好相殺害多仇  
怨不敢遠行能卧水底持刀刺魚其口嚼食並鼻飲死  
者豎棺而埋之性同禽獸至於忿怒父子不相避唯手

有兵刃者先殺之若殺其父走避於外求得一狗以謝其母然後敢歸母得狗謝不復嫌恨若報怨相攻擊必殺而食之平常劫掠賣取猪狗而已親戚比隣指授相賣被賣者號哭不服逃竄避之乃將買人捕逐若亡叛獲便縛之但經被縛者即服為賤隸不敢稱良矣亡失兒女一哭便止不復追思唯執楯持矛不識弓矢用竹為簣羣聚鼓之以為音節能為細布色至鮮淨大狗一頭買一生口其俗畏鬼神尤尚淫祀所殺之人美鬚髯

者乃剝其面皮籠之以竹及燥號之曰鬼鼓舞祀之以求福利至有賣其兒女妻孥盡者乃自賣以供祭焉鑄銅為器大口寬腹名曰銅爨既薄且輕易於熟食李勢在蜀時諸獠始出巴西渠川廣漢陽安資中犍為梓潼布在山谷十餘萬落攻破郡縣為梁益之患勢為晉將桓溫所伐內外受敵所以亡也自是蜀漢衰弱力不能制其後土人東流山險之地多空獠遂挾山傍谷與夏人參居頗輸租賦在深山者仍不為編戶梁益二州歲

伐獠以裨潤公私頗藉為利後魏宣武正始中梁漢中  
太守夏侯道遷舉州內附宣武遣尚書邢巒為梁益二  
州刺史以鎮之近夏人者安堵樂業在山谷者不敢為  
寇後以羊祉為梁州傅豎眼為益州祉性酷虐不得物  
情梁輔國將軍范季旭與獠王趙清荆率眾屯孝子谷  
祉遣統軍魏明擊走之後梁寧朔將軍姜白復擁夷獠  
入屯南城梁州人王法慶與之通謀眾屯於固門川祉  
遣征虜將軍討破之豎眼施恩布信大得獠和後以元

法僧代傳豎眼為益州法僧在任貪殘獠遂反叛勾引  
梁軍圍逼晉壽朝廷憂之以豎眼先得物情復令乘傳  
往撫獠聞豎眼至莫不欣然拜迎道路於是而定及元  
恒元子真相繼為梁州並無德績諸獠甚苦之後朝廷  
以梁益二州控攝險遠乃立巴州以統諸獠後以巴酋  
嚴始欣為刺史又立隆城鎮所綰獠二十萬戶所謂北  
獠也歲輸租布又與外人交通貿易巴州生獠並皆不  
順其諸頭王每於時節謁見刺史而已明帝孝昌初諸

獠以始欣貪暴相率反叛攻圍巴州山南行臺魏子建  
勦諭之即時散罷自是獠與諸頭王相率詣行臺者接  
踵子建厚勞來之始欣見中國多事又失獠心慮獲罪  
譴時南梁州刺史陰子春扇惑邊陲始欣謀將南叛始  
欣族子愷時為隆城鎮將密知之嚴設邏候遂禽梁使  
人并封始欣詔書鐵券刀劍衣冠之屬表送行臺子建  
乃啟以鎮為南梁州愷為刺史發使執始欣囚於南鄭  
遇子建見代梁州刺史傅豎眼仍為行臺豎眼久病其

子敬紹納始欣重賂使得還州始欣乃起衆攻愷屠滅之據城南叛梁將蕭玠率衆援接時梁益二州並遣將討之攻陷巴州執始欣大破玠軍遂斬玠以傳曇表為刺史後元羅為梁州以州入梁自此遂絕及周文平梁益之後令在所撫慰其與華人雜居者亦頗從賦役然天性暴亂旋致擾動每歲命隨近州鎮出兵討之獲其生口以充賤隸謂之為壓獠焉復有商旅往來者亦資以為貨公卿達於人庶之家有獠口者多矣恭帝三年

陵州木籠獠反詔開府陸騰討破之周保定二年鐵山  
獠又反抄斷江路陸騰又攻拔其三城天和三年梁州  
恒稜獠叛總管長史趙文表討之軍次巴州文表欲率  
衆徑進軍吏等曰此獠旅拒日久部衆高彊宜分兵四  
面攻之以離其勢今若大軍直進不遣奇兵恐并力於  
我未可制勝文表曰往者既不能制今須別為進趣若  
四面遣兵則獠降路絕理當相率以死拒戰如從一道  
則吾得示威恩遣人以理曉諭為惡者討之歸善者撫



之善惡既分易為經畧事有通變奈何欲遵前轍也文表遂以此意遍令軍中時有從軍熟獠多與恒稜親識即以實報之恒稜獠相與聚議猶豫之間文表軍已至其界獠中先有二路一路稍平一路極險俄有生獠酋帥數人來見文表曰我恐官軍不悉山川請為鄉導文表謂之曰此路寬平不須導引卿但先去好慰喻子弟也乃遣之文表謂其衆曰向者獠帥謂吾從寬路而行必當設伏險要若從險路出其不虞獠衆自離散矣於

是勒兵從險道進其有不通之處即平之乘高而望果見其伏兵獠既失計爭攜妻子退保險要文表頓軍大蓬山下示以禍福遂相率來降文表皆撫慰之仍徵其租稅無敢動者後除文表為蓬州刺史又大得人和建德初季暉為蓬梁總管諸獠亦望風從附然其種類滋蔓保據巖壑依山走險若履平地雖屢加兵弗可窮討性又無知殆同禽獸諸夷之中最難以道義招懷者也

南平獠

南平獠東距智州南屬渝州西接南州北接涪州部落  
四千餘戶多瘴癘山有毒草沙蟲蝮蛇人樓居梯而上  
名為干欄婦人橫布三幅穿中貫其首號曰通裙美髮  
髻垂於後竹筒三寸斜穿其耳貴者飾以珠璫俗女多  
男少婦人任役昏法女先以貨求男貧者無以嫁則賣  
為婢男子左衽露髮徒跣其王姓朱氏號劍荔王唐貞  
觀三年遣使入朝以其地隸渝州

東謝蠻

東謝蠻渠帥姓謝氏居黔州西三百里南距守宮獠西連夷子地方千里宜五穀為畬田歲一易之衆處山巢居汲流以飲無賦稅刻木為契見貴人執鞭而拜賞有功者以牛馬銅鼓犯小罪則杖大事殺之盜物者倍償婚姻以牛酒為聘女歸夫家夫慙澁旬日乃出會擊銅鼓吹角俗椎髻韜以絳垂於後坐必蹲踞常帶刀劍男子服衫襖大口袴以帶斜繚右肩以螺殼虎豹獐狢大羊皮為飾有謝氏世為酋長部落尊畏之其族不育女

自以姓高不可以嫁人貞觀三年其酋元深入朝冠烏皮若注旄以金銀絡額被毛帔韋行滕著履帝以其地為應州隸欽州都督府

### 西趙蠻

西趙蠻在東謝之南並南蠻別種其界東至夷子西至昆明南至西洱河山洞深阻莫知里數南北十八日行東西二十三日行其風俗與東謝同趙氏代為酋長有萬餘戶不臣中國黔州豪帥田康諷之唐貞觀中首領

趙酋摩遣使入朝後率所部內附詔以酋摩為刺史

牂柯蠻

牂柯渠帥姓謝氏舊臣中國世為本土牧守隋亂遂絕  
唐貞觀中其酋遣使修貢勝兵數萬遂列其地為牂州

兖州蠻

兖州牂柯別部與牂柯隣境勝兵二萬

今黔中郡  
羈縻州

唐貞

觀中朝貢列其地為兖州

西爨蠻

西爨者南寧之渠帥梁時通焉自云本河東安邑人七  
世祖晉南寧太守中國亂遂王蠻中梁元帝時南寧州  
刺史徐文盛徵詣荊州有爨瓚者據其地延袤二千餘  
里土多駿馬犀象明珠既死子震翫分統其衆隋開皇  
初遣使朝貢命韋世沖以兵戍之置恭州協州昆州未  
幾叛史萬歲擊之至西洱河滇池而還震翫懼而入朝  
文帝誅之諸子沒為奴唐高祖即位以其子弘達為昆  
州刺史奉父喪歸而益州刺史段倫遣俞大施至南寧

治共範川誘諸部皆納款貢方物太宗遣將擊西爨開  
青蛉弄棟為縣

昆彌蠻

昆彌一曰昆明在爨之西以西洱河為境即葉榆河也  
距長安九千里土歌濕宜秔稻人辯首左衽與突厥同  
隨水草畜牧夏處高山冬入深谷俗尚戰死惡病亡勝  
兵數萬漢武得其地入益州部其後復絕諸葛亮定南  
中亦所不至唐武德中雋州治中吉偉使南寧至其國



諭使朝貢因求內屬發兵戍守自是歲與牂柯使偕來

### 尾濮

尾濮漢魏以後在興古郡

今雲南郡地

西南千五百里徼外

其人有尾長三四寸欲坐輒先穿地為穴以安其尾尾折便死居木上食人俗又噉其老者唯識母而不識父其俗有賓客殺老者以供厨故賓婚有老者必泣其地有稷及陸稻多鹽井饒犀象有弓矢革鎧以赤獠猴皮垂錫珠翡翠為冠幘按木濮即尾濮也

又扶南土俗傳云拘利東有蒲

羅人皆有尾長五六寸其俗食人按其地並在西南蒲羅蓋尾濮之地名

### 木綿濮

木綿濮產木綿特異生房甚繁房中綿其大如拳

### 文面濮

折腰濮赤口濮附

文面濮其俗劓面以青畫之

劓音讒

又有折腰濮其俗生

子必折其腰又有赤口濮在水昌南其俗折其齒劓其脣使赤又裸露無衣服

### 黑棘濮

黑契濮在永昌西南山居耐勤苦其衣服婦人以一幅布為裙或以貫頭丈夫以穀皮為衣其境出白蹄牛犀象琥珀金桐華布又諸濮之域皆出楛矢

爾雅曰南至於濮鉛周書

王會卜人丹沙注云卜人西南之蠻丹沙所出今按卜人蓋濮人也

### 松外諸蠻

松外諸蠻數十百部大者五六百戶小者二三百凡數十姓趙楊李董為貴族皆擅山川不能相君長有城郭文字頗知陰陽厯數自夜郎滇池以西皆莊蹻之裔有

稻麥粟豆絲麻薤蒜桃李以十二月為歲首布幅廣七寸正月蠶生二月熟男子韞革為帔女衣純布裙衫髻盤如髻飯用竹筴搏而噉之象杯貯羹如雞彝徒跣有舟無車死則坎地殯舍左屋之三年乃葬以蠡蚌封棺父母喪斬衰布衣不澡者四五年近者二三年為人所殺者子以麻括髮墨面衣不緝居喪婚嫁不廢亦弗避同姓壻不親迎富室娶妻納金銀牛羊酒女所齎亦如之有罪者樹一長木擊鼓集衆其下彊盜殺之富者貫

死燒屋奪其田盜者倍九而償贓姦淫則彊族輸金銀  
請和而棄其妻處女嫠婦不坐凡相殺必報力不能則  
其部助攻之祭祀殺牛馬親聯畢會助以告酒多至數  
百人唐貞觀中數叛亂太宗遣武侯將軍梁建方發蜀  
十二州兵討之首領雙舍拒戰敗走殺獲十餘萬建方  
諭降者七十餘部戶千萬署首領蒙和為縣令以撫之  
西南夷序略

南夷君長以十數夜郎最大

後為縣屬  
牂柯郡

其西靡莫之屬

以十數滇最大

地有滇池因以爲名滇音顛

自滇以北君長以十數

邛都最大

今之邛州本其地

此皆椎結耕田有邑聚其外西自

桐師以東北至葉榆

葉榆澤名後爲縣屬益州郡

名爲雋昆明

雋即今之

雋州昆明又在其西南即今之南寧州諸蠻所居是其地也雋音髓

編髮

編音步典反

隨畜移

徙亡常處亡君長地方可數千里自雋以東北君長以

十數徙作都最大

徙及作都二國也徙後爲徙縣屬蜀郡作都後爲沈黎郡徙音斯作音村

各自作以東北君長以十數冉駹最大

今夔州開州首領多姓冉者本

皆冉種也駹音毛

其俗或土著或移徙在蜀之西自駹以東君

長以十數白馬最大皆氐類也此皆巴蜀西南外蠻夷

也始楚威王時使將軍莊蹻將兵循江上

蹻音居畧反

畧巴

黔中以西

黔中即今黔州是其地本巴人也

莊蹻者楚莊王苗裔也蹻

至滇池方三百里

益州滇池縣其澤在西北澤下流淺狹狀如倒流故曰滇池

旁平

地肥饒數千里以兵威定屬楚欲歸報會秦擊奪楚巴

黔中郡道塞不通因乃以其衆王滇變服從其俗以長

之秦時嘗破略通五尺道

其處險阨故道才廣五尺

諸此國頗置吏

焉十餘歲秦滅及漢興皆棄此國而關蜀故徼

西南之徼猶北

方塞也徵音工鈞反

巴蜀民或竊出商賈取其祚馬棘僮旄牛以

此巴蜀殷富建元六年大行王恢擊東粵東粵殺王郢

以報恢因兵威使番陽令

番音婆

唐蒙風曉南粵

風音諷

南

粵食蒙枸醬

枸音矩子形如桑椹緣木而生味辛蜀人取其實為醬以為珍味也食音嗣

蒙

問所從來曰道西北牂柯江江廣數里出番禺城下

番禺音

番禺音愚

蒙歸至長安問蜀賈人獨蜀出枸醬多持竊出市

夜郎夜郎者臨牂柯江江廣百餘步足以行船南粵以財物役屬夜郎西至桐師然亦不能臣使也蒙上書說



上曰南粵王黃屋左纛地東西萬餘里名為外臣實一

州主今以長沙豫章往水道多絕難行竊聞夜郎所有  
精兵可得十萬浮船牂柯出不意此制粵一奇也誠以  
漢之疆巴蜀之饒通夜郎道為置吏甚易上許之乃拜

蒙中郎將將千人食重萬餘人從巴柝關入遂見夜郎

侯多同

多同其  
侯名也

厚賜諭以威德約為置吏使其子為令

比之於  
漢縣也

夜郎旁小邑皆貪漢繒帛以為漢道險終不能

有也乃且聽蒙約還報乃以為犍為郡發巴蜀卒治道

自棘道指牂柯江蜀人司馬相如亦言西夷可置  
郡使相如以郎中將往諭皆如南夷為置一都尉十餘  
縣屬蜀當是時巴蜀四郡通西南夷道載轉相饟數歲  
道不通士罷餓餒離暑溼死者甚衆西南夷又數反發  
兵興擊耗費亡功上患之使公孫弘往視問焉還報言  
其不便及弘為御史大夫時方築朔方據河逐胡弘等  
因言西南夷為害可且罷專力事匈奴上許之罷西夷  
獨置南夷兩縣一都尉稍令犍為自保就及元狩元年

博望侯張騫言使大夏時見蜀布邛竹杖問所從來曰  
從東南身毒國可數千里得蜀賈人市或聞邛西可二  
千里有身毒國騫因盛言大夏在漢西南慕中國患匈  
奴隔其道誠通蜀身毒國道便近又亡害於是天子乃  
令王然于柏始昌呂越人等十餘輩間出西南夷指求  
身毒國至滇滇王當羌乃留為求道四歲餘皆閉昆明  
莫能通滇王與漢使言漢孰與我大及夜郎侯亦然各  
自以一州王不知漢廣大使者還因盛言滇大國足事

親附天子注意焉及至南粵反上使馳義侯因捷為發

南夷兵且蘭君

且子餘反

恐遠行旁國虜其老弱乃與其衆

反殺使者及捷為大守漢乃發巴蜀罪人當擊南粵者

八校尉擊之會越已破漢八校尉不下中郎郭昌衛廣

引兵還行誅隔滇道者且蘭斬首數萬遂平南夷為牂

柯郡夜郎始倚南粗南粗已滅還誅反者夜郎遂入朝

上以為夜郎王南粗破後及漢誅且蘭邛君并殺柞侯

冉駝皆震恐請臣置吏以邛都為粗雋郡柞都為沈黎

郡冉駹為文山郡廣漢西白馬為武都郡使王然于以

粵破及誅南夷兵威風諭滇王入朝滇王者其衆數萬人其旁東北勞深靡莫皆百姓相杖未肯聽勞莫數侵

犯使者吏卒元封二年天子發巴蜀兵擊滅勞深靡莫

以兵臨滇滇王始首善以故弗誅滇王離西夷舉國降

離西夷謂東嚮事漢

請置吏入朝於是以為益州郡賜滇王王復

長其民西南夷君長以百數獨夜郎滇受王印滇小邑

也最寵焉後二十三歲孝昭始元元年益州廉頭姑繒

民反殺長吏牂柯談指同並等二十四邑凡三萬餘人

皆反

反並音伴

遣水衡都尉發蜀郡犍為犇命萬餘人擊牂

柯大破之後二歲姑繒葉榆復反遣水衡都尉呂辟胡

將郡兵擊之辟胡不進蠻夷遂殺益州太守乘勝與辟

胡戰士戰及溺死者四千餘人明年復遣軍正王平與

大鴻臚田廣明等並進大破益州斬首捕虜五萬餘級

獲畜產十餘萬上曰鈞町侯亡波率其邑君長人民擊

反者

鈞音劬町音定

斬首捕虜有功其立亡波為鈞町王大鴻

臚廣明賜爵關內侯食邑三百戶後間歲武都氏人反

遣執金吾馬適建龍頌侯韓增與大鴻臚廣明將兵擊

之至成帝河平中夜郎王興與鈞町王禹漏卧侯俞

漏卧

夷邑名後為縣俞音踰

更舉兵相攻牂柯太守請發兵誅興等議

者以為道遠不可擊乃遣太中大夫蜀郡張匡持節和

解興等不從命刻木象漢吏立道旁射之杜欽說大將

軍王鳳曰太中大夫匡使和解蠻夷王侯王侯受詔已

復相攻輕易漢使不憚國威其効可見恐議者選更復

守和解

選奕怯不前之意也選音息充反奕音人充反

太守察動靜有變乃以

聞如此則復曠一時王侯得收獵其衆申固其謀黨助

衆多各不勝忿必相殄滅自知罪成狂犯守尉

言起狂悖殺守

尉遠藏溫暑毒草之地雖有孫吳將賁育士若入水火

往必焦沒知勇亡所施屯田守之費不可勝量宜因其

罪惡未成未疑漢家加誅陰勅旁郡守尉練士馬大司

農豫調穀積要害處選任職太守往以秋涼時入誅其

王侯尤不軌者即以為不毛之地亡用之民聖王不以



勞中國宜罷郡放棄其民絕其王侯勿復通如以先帝

所立累世之功不可墮壞亦宜因其萌芽早斷絕之及

已成形然後戰師則萬姓被害大將軍鳳於是薦金城

司馬陳立拜為牂柯太守立者臨邛人前為連然長不

韋令

皆益州縣也

蠻夷畏之及至牂柯諭告夜郎王興興不

從命立請誅之未報乃從吏數十人出行縣

行音下更反

至

興國且同亭

且音子余反

召興興將數千人往至亭從邑君

數十人入見立立數責因斷頭

數音所具反

邑君曰將軍誅

亡狀為民除害願出曉士眾以興頭示之皆釋兵降鉤

町王禹漏卧侯俞震恐入粟千斛牛羊勞吏士立還歸

郡興妻父翁指與興子邪務收餘兵迫脅旁二十二邑

反至冬立奏募諸夷與都尉長史分將攻翁指等翁指

據院為壘立使奇兵絕其饗道縱反間以誘其眾都尉

萬年曰兵久不決費不可共

共讀曰供

引兵獨進敗走趨立

營立怒叱戲下令格之都尉復還戰立引兵救之時天

大旱立攻絕其水道蠻夷共斬翁指持首出降立已平

定西夷徵詣京師會巴郡有盜賊復以立為巴郡太守  
秩中二千石居賜爵左庶長徙為天水太守勸民農桑  
為天下最賜金四十斤入為左曹衛將軍護軍都尉卒  
官王莽篡位改漢制貶鈞町王以為侯王邯怨恨

邯其王名

也邯音酣 牂柯大尹周欽詐殺邯邯弟承攻殺欽州郡擊之

不能服三邊蠻夷愁擾盡反復殺益州大尹程隆莽遣  
平蠻將軍馮茂發巴蜀犍為吏士賦斂取足於民以擊  
益州出入三年疾疫死者什七巴蜀騷動莽徵茂還誅

之更遣寧始將軍廉丹與庸部牧史熊

莽改益州為庸部

大發

天水隴西騎士廣漢巴蜀犍為吏民十萬人轉輸者合

二十萬人擊之始至頗斬首數千其後軍糧前後不相

及士卒饑疫三歲餘死者數萬而粵雋蠻夷任貴亦殺

太守枚根自立為邛穀王

枚根太守之姓名

會莽敗漢興誅貴

復其舊號建武以後西南夷夜郎滇地邛笮冉駹諸國

悉皆臣屬如先漢時又有哀牢焦僊禪國諸夷自昔不

通中國者亦奉職貢有以見漢德之大也其在隋世則

復有所謂附國者距蜀郡西北二千餘里大業中遣使入貢蓋亦西南夷云

### 夜郎

夜郎漢時通焉初夜郎有女子浣於遯水有三節大竹流入足間聞其中有號聲剖竹視之得一男兒歸而養之及長有才武自立為夜郎侯以竹為姓武帝元鼎六年平南夷為牂柯郡夜郎侯迎降賜其王印綬後遂殺之夷獠咸以竹王非血氣所生甚重之求為立後牂柯

太守吳霸以聞天子乃封其三子為侯死配食其父今

夜郎縣有竹王三郎神是也

前書地理志曰夜郎有邈水東至廣鬱華陽國志云

邈水通鬱林有三郎祠皆有靈響又云竹王所捐破竹於野成竹林今王祠有竹林是也王嘗從人止大石上令作羹從者白無水王以劍擊石出水今竹王水是也按漢書夜郎侯降封王不言殺之至成帝時猶謂之夜郎王獨范史云竹王被殺後封其子為侯與班史牴牾今兩存之初楚頃襄王之時遣

將莊豪從沅水伐夜郎軍至且蘭桡船於岸而步戰既

滅夜郎因留王滇池以且蘭有桡船牂柯處乃改其名

為牂柯

牂柯繫船杙也按史記及漢書皆云楚威王時使莊躋畧巴黔以西至滇池欲歸會秦奪楚巴

黔中郡因以其衆王滇後十餘歲秦滅又按楚自威王  
後懷王立三十年至頃襄王之二十二年秦昭襄王遣  
兵攻楚取巫黔中郡地後漢史則云頃襄王時莊豪王  
滇豪即躋也若莊躋自威王時將兵略地屬秦陷巫黔  
中郡道塞不通凡經五十二年豈得如此淹久或恐史  
記誤謬班固循習而書范曄所記詳改為正又按莊躋  
王滇後十五年頃襄王卒考烈王立二十五年幽王立  
十年王貧窮立五年而楚滅後十五年而秦亡凡七十  
年何故云躋之王滇後十餘歲而秦亡斯又未之詳也躋音渠略反梓柯地多雨潦俗好  
巫鬼禁忌寡畜產又無蠶桑故其郡最貧鈞町縣有枕

榔木可以為麵百姓資之

臨海異物志曰枕榔外皮有毛似柑櫚而散生其木剛作

誤鋤利如鐵中石更利唯中焦根乃致敗耳皮中有似  
擣稻米片又似麥麵中作餅餌廣志曰枕榔樹大四五

園長五六丈洪直旁無枝條其顛生葉不過數十似樓葉破其木肌堅難傷入數寸得麵赤黃密緻可食也

公孫述時大姓龍傳尹董氏與郡攻曹謝暹保境為漢乃遣使從番禺江奉貢光武嘉之並加褒賞桓帝時郡人尹珍自以生於荒裔不知禮義乃從汝南許慎應奉受經書圖緯學成還鄉里教授於是南域始有學焉珍官至荊州刺史

尹珍字道真母歛縣人也

### 滇國

滇王者莊蹻之後也元封三年武帝平之以其地為益



州郡割牂柯越雋各數縣配之後數年復并昆明地皆以屬之此郡有池周回二百餘里水源深廣而末更淺狹有似倒流故謂之滇池河土平敞多出鸚鵡孔雀有鹽池田漁之饒金銀畜產之富人俗豪怵

怵奢侈也

居官者

皆富及累世及王莽政亂益州郡夷棟蠶若豆等起兵殺郡守越雋姑復夷人太牟亦皆叛殺略吏民莽遣寧始將軍廉丹發巴蜀吏民及轉兵穀卒徒十餘萬擊之吏士饑疫連年不能尅而還以廣漢文齊為太守造起

波池開通溉灌墾田二千餘頃率厲兵馬脩障塞降集

羣夷甚得其和及公孫述據益州文齊固守拒險述拘

其妻子許以封侯齊終不降聞光武即位乃間道遣使

自聞蜀平徵為鎮遠將軍封成義侯於道卒詔為起祠

堂郡人立廟祀之建武十八年夷渠帥棟蠡與姑復櫟

榆枿棟連然滇池建伶昆明諸種反叛殺長吏益州太

守繁勝與戰而敗退保朱提

縣屬犍為郡朱  
音殊提音匙

十九年遣

武威將軍劉尚等發廣漢犍為蜀郡人及朱提夷合萬

三千人擊之尚軍遂渡瀘水入益州界

瀘水一名若水出犍牛徼外經

朱提至犍道入江在今雋州南特有瘴氣三月四月經之必死五月以後行者得無害故諸葛亮表云五月渡

瀘言其艱苦也

羣夷聞大兵至皆棄壘奔走尚獲其羸弱穀畜

二十年進兵與棟蠡等帥連戰數月皆破之明年四月

追至不韋

孫盛蜀譜曰初秦徙呂不韋子弟宗族於蜀漢武帝開西南夷置郡縣徙呂氏以充之因

置不韋縣華陽國志曰武帝通博南山置不韋縣徙南越相呂嘉宗族實之因名不韋以章其先人惡行也

斬棟蠡帥凡首虜七千餘人得生口五千七百人馬三

千匹牛羊三萬餘頭諸夷悉平肅宗元和中蜀郡王追

為太守政化尤異有神馬四匹出滇池河中甘露降白  
鳥見始興起學校漸遷其俗靈帝熹平五年諸夷反叛  
執太守雍陟遣御史中丞朱龜討之不能尅朝議以為  
郡在邊外蠻夷喜叛勞師遠役不如棄之太尉掾巴郡  
李顥建策討伐乃拜顥益州太守與刺史龐芝發板楯  
蠻擊破平之還得雍陟顥卒後夷人復叛以廣漢景毅  
為太守討定之毅有惠政為夷人所懷蜀後主建興二  
年丞相諸葛亮率衆南征四郡平之改益州郡為建寧

分建寧永昌為雲南郡又分建寧牂柯為興古郡焉

### 邛都

邛都夷漢武帝所開以為邛都縣無幾而地陷為汙澤

因名為邛池南人以為邛河

在今雋州越雋縣東南南中八郡志曰邛河縱廣岸

二十里深百餘丈多大魚長一二丈頭特大遙視如戴鐵釜狀李膺益州記云邛都縣下有一老姥家貧孤獨每食有小蛇頭上戴角在床間姥憐而飴之後稍長大遂長丈餘令有駿馬蛇遂吸殺之令因大忿姥限責出蛇姥云在牀下令即掘地愈深愈大而無所見令又遷怒殺姥蛇乃感人以靈言瞋令何殺我母當為母報讎此後每夜輒聞若雷若風四十許日百姓相見咸驚語汝頭那忽戴魚是夜方四十里與城一時俱陷為湖土

人謂之為陷河。唯堯宇無恙。訖今猶存。漁人採捕必依止宿。每有風浪輒居宅側。恬靜無佗風靜水清。猶見城郭樓櫓。粲然今水淺時。彼土人沒水取得舊木。堅貞光黑如漆。有好事人以為枕。相贈。粲音測。後復反。

叛元鼎六年。漢兵自越雋水伐之。以為越雋郡。

雋水源出今雋

州。即部縣西南。雋山下。前書地里志曰。言其越雋水以置郡。故名焉。

其土地平原有稻田。

青蛉縣。禺同山有碧雞。金馬光景時時出見。

禺同山在今襄州揚

波縣王褒碧雞頌曰。持節使王褒謹拜南崖敬移金精神馬。縹碧之雞處南之荒深谿。曰谷非士之鄉。歸來歸來。漢德無疆。兼乎唐虞。澤配三皇。華陽國志曰。碧雞俗光景人多見之前書音義曰。金形似馬。碧形似雞也。俗。

多游蕩而喜謳歌。與梓柯相類。豪帥放縱。難得制御。王。

莽時郡守枚根調邛人長貴以為軍候

漢書長貴作任貴

更始

二年長貴率種人攻殺枚根自立為邛穀王領太守事  
又降於公孫述述敗光武封長貴為邛穀王建武十四  
年長貴遣使上三年計天子即授越雋太守印綬十九  
年武威將軍劉尚擊益州夷路由越雋長貴聞之疑尚  
既定南邊威法必行已不得自放縱即聚兵起營臺招  
呼諸君長多釀毒酒欲先以勞軍因襲擊尚尚知其謀  
即分兵先據邛都遂掩長貴誅之徙其家屬於成都永

平元年姑復夷復叛益州刺史發兵討之斬其渠帥傳首京師後太守巴郡張翕政化清平得夷人和在郡十

七年卒夷人愛慕如喪父母蘇祈叟二百餘人

蘇祈縣屬越雋

郡齋牛羊送喪至翕本縣安漢

安漢縣屬巴郡

起墳祭祀詔書

嘉美為立祠堂安帝元初三年郡徼外夷大羊等八種

戶三萬一千口十六萬七千六百二十慕義內屬時郡

縣賦斂煩數五年以卷夷大牛種封離等反畔殺遂久

令遂久故縣在明年永昌益州及蜀郡夷皆叛應之衆

今靡州界



遂十餘萬破壞二十餘縣殺長吏燔燒邑郭剽掠百姓骸骨委積千里無人詔益州刺史張喬選堪能從事討之喬乃遣從事楊竦將兵至標榆擊之賊盛未敢進先以詔書告示三郡密徵求武士重其購賞乃進軍與封離等戰大破之斬首三萬餘級獲生口五百人資財四千餘萬悉以賞軍士封離等惶怖斬其同謀渠帥詣竦乞降竦厚加慰納其餘三十六種皆來降附竦因奏長吏姦猾侵犯蠻夷者九十人皆減死州中論功未及上

會竦病創卒張喬深痛惜之乃刻石勒銘圖畫其像天子以張翕有遺愛乃拜其子湍為太守夷人懽喜奉迎道路曰郎君儀貌類我府君後湍頗失衆心有欲叛者諸夷耆老相曉語曰當為先府君故遂以得安後順桓間廣漢馮顥為太守尤多異迹云

作都

作都夷者漢孝武帝所開以為作都縣其人皆被髮左衽言語多好譬類居處略與文山夷同土出長年神藥

仙人山圖所居焉

劉向神仙傳曰山圖隴西人好乘馬馬躡折脚山中道士教服地黃當歸

羌活元參服一年不嗜食病愈身輕追道士問之自云五岳使我之名山採藥能隨吾汝便不死山圖追隨人不復見六十餘年一旦歸來行母服於冢間暮年復去莫知所之也元鼎六年以為沈黎

郡至天漢四年并蜀為西部置兩都尉一居旄牛主徼

外夷一居青衣主漢人永平中益州刺史梁國朱輔好

立功名慷慨有大略在州數歲宣示漢德威懷遠夷自

汶山以西前世所不至正朔所未知白狼槃木唐敢等

百餘國戶百三十餘萬口六百萬以上舉種奉貢稱為

臣僕輔上疏曰臣聞詩云彼徂矣岐有夷之行傳曰岐道雖僻而人不遠詩人誦詠以為符驗今白狼王唐菽

等慕化歸義作詩三章路經邛來大山零高坂

山海經曰崷山

江水出焉郭璞曰中江所出也華陽國志曰邛來山本名邛作故邛人作人界也巖阻峻回曲折乃至山上凝冰夏結冬則劇寒王陽行部至此而退者也有長貧若採八渡之難陽母閼峻並坂名

峭危峻險

百倍岐道襁負老幼若歸慈母遠夷之語辭意難正草木異種鳥獸殊類有犍為郡掾田恭與之習狎頗曉其言輒令訊其風俗譯其辭語今遣從事史李陵與恭護

送詣闕并上其樂詩昔在聖帝舞四夷之樂今之所上

庶備其一帝嘉之事下史官錄其歌焉

東觀記載其歌并重譯訓詁為

華言今范史所載者是也今錄東觀夷語以為此注

遠夷樂德歌詩曰大漢是治

提宮隗構與天合意

魏冒踰糟

吏譯平端

周譯劉脾

不從我來

旁草聞支留

風向化

徵衣隨旅

所見奇異

知唐桑艾

多賜繒布

邪毗堪繡

甘美酒食

推潭僕遠

昌樂肉飛

拓拒蘇便

屈申悉備

局後仍離

蠻夷貧薄

僂讓龍洞

無

所報嗣

莫支度由

願主長壽

陽維僧鱗

子孫昌熾

莫禪角存

遠夷慕德

歌詩曰蠻夷所處

屢讓被尼

日入之部

且交陵悟

慕義向化

繩動隨旅

歸日出主

歸且  
陳維

聖德深恩

聖德  
渡諾

與人富厚

魏苗  
度洗

冬多霜

雪

綜邪  
流藩

夏多和雨

作邪  
尋螺

寒溫時適

藐淶  
瀘離

部人多有

苗補  
邪推

涉危歷險

辟危  
歸險

不遠萬里

莫受  
萬柳

去俗歸德

衍疊  
附德

心歸慈

母

仍路  
孽摸

遠夷懷德歌曰荒服之外

荒服  
之儀

土地境埆

犁籍  
憐憐

食肉衣皮

阻蘇  
邪犁

不見鹽穀

莫碣  
龜水

吏譯傳風

周譯  
傳薇

大漢安

樂

是漢  
夜拒

攜負歸仁

蹤優  
路仁

觸冒險陝

雷折  
險龍

高山岐峻

倫狼  
藏墮

緣崖磻石

扶路  
劍祿

木薄發家

息落  
厭淫

百宿到洛

理滯  
髭維

父子同

賜

捕莖  
菌毗

懷抱匹帛

懷橐  
匹漏

傳告種人

傳室  
呼勃

長願臣僕

陵陽  
臣僕

肅宗初輔坐事免是時郡尉府舍皆有雕飾畫山神海  
靈奇禽異獸以眩耀之夷人益畏憚焉和帝永元十二  
年旄牛徼外白狼樓薄蠻夷王唐繒等遂率種人十七  
萬口歸義內屬詔賜金印紫綬小豪錢帛各有差安帝  
永初元年蜀郡三襄種夷與徼外汙衍種并兵三千餘  
人反叛攻蠶陵城殺長吏二年青衣道夷邑長令田姓令  
田與徼外三種夷三十一萬口齎黃金旄牛牂顧野王曰牂結  
毛為飾也即今馬及弓槊上纓牂也舉土內屬安帝增令田爵號為奉通

邑君延光二年春旄牛夷叛攻零關

郡國志零關道屬越雋郡

殺長

吏益州刺史張喬與西部都尉擊破之於是分置蜀郡屬國都尉領四縣如太守桓帝永壽二年蜀郡夷叛殺略吏民延熹二年蜀郡三襄夷寇蠶陵殺長吏四年犍為屬國夷寇郡界益州刺史山昱擊破之斬首千四百級餘皆解散靈帝時以蜀郡屬國為漢嘉郡

冉駝

冉駝夷漢武帝所開元鼎六年以為汶山郡至地節三



年夷人以立郡賦重宣帝乃省并蜀郡為北部都尉其  
山有六夷七羌九氏各有部落其王侯頗知文書而法  
嚴重貴婦人黨母族死則燒其尸土氣多寒在盛夏冰  
猶不釋故夷人冬則避寒入蜀為傭夏則違暑反其邑

衆皆依山居止累石為室高者至十餘丈為邛籠

案今彼土

夷人呼為碕也

又土地剛鹵不生穀粟麻菽唯以麥為資而宜

畜牧有旄牛無角一名童牛肉重千斤毛可為毼出名

馬有靈羊可燎毒

本草經曰零羊角味鹹無毒主療青盲蟲毒去惡鬼安心氣彊筋骨也

又有食藥鹿鹿麕有胎者其腸中糞亦療毒疾又有五

角羊麕香輕毛駝雞牲牲

郭璞注山海經曰駝雞似雉而大青色有毛角鬬敵死乃

止其人能作旄氈班罽青頓氍毹羊羖之屬

青頓氍毹羖並未詳字

書無此二字周書伊尹為四方獻令曰正西昆侖狗國鬼親枳已闌耳貫勾雕題離邱漆齒請令以丹青白旄純罽龍角神龜為獻湯曰善何承天纂文曰純氐罽也音卑疑反氍即純也

特多雜藥地有

鹹土煮以為鹽麕羊牛馬食之皆肥

麕即麕狼也異物志狀似鹿而角觸

前向人林樹掛角故常在平淺草中肉肥脆香美逐入林則搏之皮可作履韉角正四據南人因以為牀音子

今其西又有三河槃于虜北有黃石北地盧水胡其表

乃為徼外靈帝時復分蜀郡北部為汶山郡蜀後主建興十年汶山平康夷反姜維討破之

哀牢夷

揮國及僂夷並附

哀牢夷後漢時通焉其先有婦人名沙壹居于牢山嘗捕魚水中觸沈木若有感因懷姙十月產子男十人後沈木化為龍水上沙壹忽聞龍語曰若為我生子今悉何在九子見龍驚走獨小子不能去背龍而坐龍因舐之其母鳥語謂背為九謂坐為隆因名子曰九隆及

後長大諸兄以九隆能為父所舐而黥遂共推以為王

後牢山下有一夫二婦復生十女子九隆兄弟皆娶以

為妻後漸相滋長種人皆刻畫其身象龍文衣著尾九

隆死世世相繼

哀牢傳曰九隆代代相傳不可得數至於禁高乃可記知禁高死子吸代吸死

子建非代建非死子哀牢代哀牢死子桑藕代桑藕死子柳承代柳承死子柳貌代柳貌死子扈栗代乃

分置小王往往邑居散在谿谷絕域荒外建武二十五

年其王賢栗遣兵乘單船

單音排縛竹木為單以當船

南下江漢擊

附塞夷鹿多

音多

鹿多人弱為所禽獲於是震雷疾雨南

風飄起水為逆流翻涌二百餘里軍船沈沒哀牢之衆溺死數千人賢栗復遣其六王將萬人以攻鹿多鹿多王與戰殺其六王哀牢耆老共埋六王夜虎復出其尸而食之餘衆驚怖引去賢栗惶恐謂其耆老曰我曹入邊塞自古有之今攻鹿多輒被天誅中國其有聖帝乎天祐助之何其明也二十七年賢栗等遂率種人戶二千七百七十口萬七千六百五十九詣越雋太守鄭鴻降求內屬光武封賢栗等為君長自是歲來朝貢永平

十二年哀牢王柳貌遣子率種人內屬其稱邑王者七

十七人戶五萬一千八百九千口五十五萬三千七百

一十一西南去洛陽七千里顯宗以其地置哀牢博南

二縣割益州郡西部都尉可領六縣

古今注曰永平十年置益州西部都

尉居舊唐續漢志六縣謂不韋  
舊唐比蘇標榆邪龍雲南也

合為永昌郡始通博南

山度蘭倉水

華陽國志曰博南縣西山高  
三十里越之渡蘭倉水也

行者苦之歌

曰漢德廣開不賓度博南越蘭津度蘭倉為他人哀牢

皆穿鼻儋耳其渠帥自謂王者耳皆下肩三寸庶人則

至肩而已土地沃美宜五穀蠶桑知染采文繡蜀筵帛

疊

杜薄傳云其國女子織作白疊花布

蘭干細布

華陽國志曰蘭干獠言紵

織成文章

如綾錦有梧桐木華績以為布

廣志曰梧桐有白者剝國有桐木其花木白毳

取其毳淹漬緝織以為布也

幅廣五尺絜白不受垢汙先以覆亡人

然後服之其竹節相去一丈名曰濮竹出銅鐵鉛錫金

銀光珠

華陽國志曰蘭倉水有金沙洗取融為金有光珠穴博物志曰光珠即江珠也

虎魄水

精瑠璃軻蟲蚌珠孔雀翡翠犀象猩猩豹獸

鄺道元水經注曰猩

猩形若狗而人面頭顏端正善與人言音聲妙麗如婦人對語聞之無不酸楚南中志曰猩猩在山谷中行無

常語百數為羣土人以酒若糟設於路又喜麝子土人織草為屨數十兩相連結猩猩在山谷見酒及麝知其設張者即知張者先祖名字乃呼其名而罵云奴欲張我捨之而去而又還相呼試共嘗酒初嘗少許又取麝子著之若進酒三升便大醉人出收之麝子相連不得去執還內牢土人欲取者到牢邊語云猩猩汝可自相推肥者出之既擇竟相對而泣即左思賦云猩猩啼而就禽者也昔有人以猩猩餉封溪令令問餉何物猩猩自於籠中曰但有酒及僕耳無他飲食南中八郡志曰豹大如驢狀頗似熊多力食鐵所觸無不拉廣志曰其皮溫煖

雲南縣有神鹿兩頭能食毒草先是西部都

尉廣漢鄭純為政清潔化行夷貊君長感慕皆獻土珍  
頌德美天子嘉之即以為永昌太守純與哀牢夷人約



邑豪歲輸布貫頭衣二領鹽一斛以為常賦夷俗安之  
純自為都尉太守十年卒官建初元年哀牢王類牢與  
守令忿爭遂殺守令而反叛攻越雋唐城太守王尋奔  
牂榆哀牢三千餘人攻博南燔燒民舍肅宗募發越雋  
益州永昌夷漢九千人討之明年春邪龍縣邪龍縣屬永昌昆  
明夷鹵承等應募率種人與諸部兵擊類牢於博南大  
破斬之傳首洛陽賜鹵承帛萬匹封為破虜傍邑侯永  
元六年郡徼外敦忍乙王莫延募義遣使譯獻犀牛大

象九年徼外蠻及揮國王雍由調

揮音擅東觀作擅字

遣重譯奉

國珍寶和帝賜金印紫綬小君長皆加印綬錢帛永初  
元年徼外焦僥種夷陸類等三千餘口舉種內附獻象  
牙水牛封牛永寧元年揮國王雍由調復遣使者詣闕  
朝賀獻樂及幻人能變化吐火自支解易牛馬頭又善  
跳丸數乃至千自言我海西人海西即大秦也揮國西  
南通大秦明年元會安帝作樂於庭封雍由調為漢大  
都尉賜印綬金銀綵繒各有差也

# 附國


附國隋時通焉在蜀郡西北二千餘里即漢之西南夷也有嘉良夷即其東部所居種姓自相率領土俗與附國同言語少殊不能統一其人並無姓氏附國王字宜縉其國南北八百里東西千五百里無城柵近川谷傍山險俗好復讎故壘石為礮與巢同以避其患其礮高至十餘丈下至五六丈每級以木隔之基方三四步礮上方二三步狀似浮圖於下致級開小門從內上通夜必

關閉以防賊盜國有重罪者罰牛人皆輕捷便擊劍漆皮為牟甲弓長六尺竹為箭妻其羣母及嫂兄弟父兄亦納其妻好歌舞鼓簧吹長角有死者無服制置屍高牀之上沐浴衣服以牟甲覆以獸皮子孫不哭帶甲舞劍而呼云我父為鬼所取我欲報冤殺鬼自餘親戚哭三聲而止婦人哭必兩手掩面死家殺牛親屬以胾酒相遺共飲噉而瘞之死後十年方始大葬必集親賓殺馬動至數十匹立木為祖父神而事之其俗以皮為帽

形圓如鉢或戴罽羅衣多駝皮裘全剝牛脚皮為靴項  
繫鐵鎖手貫鐵釧王與酋帥金為首飾胸前縣一金花  
徑三寸其土高氣候涼多風少雨土宜小麥青稞山出  
金銀銅多白雉水有嘉魚長四尺而鱗細大業四年其  
王遣使素福等八人入朝明年又遣其弟子宜林率嘉  
良夷六十人朝貢欲獻良馬以路險不通請開山道修  
職貢物煬帝以勞民不許嘉良有水闊六七十里附國  
有水闊百餘丈並南流用皮為舟而濟附國有薄緣夷

風俗亦同西有女國其東北連山縣亘數千里接於党  
項往往有羌大小左封昔衛葛延白狗向人望族林臺  
春桑利豆迷桑婢藥大硤白蘭北利摸徒那鄂當迷渠  
或役屬吐谷渾或附國大業中朝貢緣西南邊置  
諸道總管以管之

通志卷一百九十七



總校官庶吉士 臣侍 朝

校對官編修 臣裴 謙

膳錄監生 臣蔣瞻 崧